

**Peqatigiiffiit kattuffiillu suugaluartulluunniit, nammineq kajumissutsimik ingerlanneqartuni aningaasanik katersuiniarneranni nipilersortartunik Namminersorlutik Oqartussaniit tapiiffiqineqarlutik tikisitsisinnaanerit pillugu Naalakkersuisut piareersaateqaqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaqaq Doris Jacobsen Jensen, Siumut)

### **Akissuteqaat**

(Meeqqanut, Inuusuttunut, Ilinniartitaanermit, Kultureqarnermit, Timersornermit Ilageeqarnermullu Naalakkersuisoq)

### **Siullermeerneqarnera**

Inatsisartuni ilaasortap Doris Jacobsen Jensenip Siumumeersup Inatsisartut aalajangiiffigisassaattut siunnersuummik saqqummiussaqaqarneranut Naalakkersuisut sinnerlugit qujavunga.

Timersoqatigiiffiit peqatigiiffinni aqqissuussinernut tunngatillugu eqqumiitsuliortunik tikisitsinissaminut tassunga ilanngullugit soorlu katersuiniarnernut atatillugu nipilersortartut tikisinnissaanut aningaasartuutaasa matussutissaannik tapiissutissanik qinnuteqarnissamut soqutiginninnerup killeqarsimanera soqutiginninnerullu ukioq manna aatsaat taama annertutiginera Naalakkersuisut maluginiarpaat.

2025-mut aningaasanut inatsisissatut siunnersuummi konto pingaarneq 40.95.01 tapiissutit allat eqqumiitsuliortnermit kulturimullu atugassat aqqutigalugit 382.000 kr.-inik aningaasaliisoqarnissaa siunnersuutigineqarpoq. Ukioq manna siunertamut tassunga aningaasaliisutit 638.000 kr.-iusut septembarip aallartisimalernerani tamakkerlutik atornerqarsimalereerput. Timersoqatigiiffiit qinnuteqaataat arlallit tamatuma kingunerisaannik itigartinneqartariaqarsimapput ukiullu naajartulernerani qinnuteqartut qatangiinnarneqartariaqassallutik.

Timersoqatigiiffiit qinnuteqartut arlallit tapiiffiqineqarsinnaasut annertusineqarsinnaaneri ujartorsimavaat, angalanernut aningaasartuutit saniatigut allanut tapiisoqarsinnaanngorlugu. Nipilersortartut aningaasarsiassaanut aningaasartuutit – aqqissuisut soorlu katersortarfiup attartorneranut aningaasartuutit assigalugit annertuumik aningaasartuutigisartagaat ilanngaatigineqareernerisigut aqqissuinerne isertinneqartartut killeqartarput, pingaartumik inukinnerusuni aqqissuinerne. 2025-mut Aningaasanut Inatsisissatut Siunnersuutip suliarinerani timersoqatigiiffiit kissaataat malillugu aningaasanik allanit nuussinikkut nutaanilluunniit aningaasaliinikkut amerlanerusunik aningaasaliisinaanissaq periarfissaqarsimangilaq.

Qinnuteqartartut amerlassusaat ukioq mannalugu atugassatut aningaasaliissutaasimasut aallaavigigutsigit peqatigiiffiit kattuffiillu kajumissutsimik ingerlanneqartut tamarmik aningaasaliissutinit taakkunanga aningaasaliiffiqineqartallissappata aningaasaliissutit minnerpaamik marloriaatinngortittariaqassapput tassalu 1.495.000 kr.-innngorlutik, nipilersortartullu akissarsiassaat katersortarfinnullu aningaasartuutit ilanngunneqarpata sulii annertunerussallutik.

Peqatigiiffiit kattuffiilluunniit nammineq piumassutsimik ingerlanneqartut timersoqatigiiffiit assigalugit tapiiffigineqarsinnaanissaanik siunnersuuteqartup oqariartuuteqarnera Naalakkersuisut isumaqatigaat. Tapiiffigineqarsinnaasulli amerlineri massakkut aningaasaliissutaasunit matussuseqarsinnaanngitsut Naalakkersuisunit nalilerneqarpoq. Aningaasaliissutit amerlinagit tapiiffigineqarsinnaasunik annertusaaneq timersoqatigiiffinnut kingunerluttussaavoq aningaasaliissutit allanngortinneqanngitsut susassaqtunit amerlanerusunit atorneqarsinnaalissammata.

Aaqqissuussap annertusineqarsinnaanera Aningaasanut inatsimmi 2025-imi ukiunilu missingersuusiorfiusuni siunnersuutigineqarsimanngilaq. 2025-imut aningaasanut inatsisissatut siunnersuutip nalinginnaasumik nassuiaatitaani atuarneqarsinnaasut aningaasartuutissanut nutaanut akissaqartoqanngilaq taamaattumillu siunnersuutit aningaasartuutitaqartut ileqqaarfiusinnaasutut siunnersuutinik ilaqartariaqartartussaallutik.

Naalakkersuisut taamatut oqaaseqarlutik siunnersuutip akuerineqarnissaa inassutigaat.